

四庫全書

集部

欽定四庫全書

集部

誠齋集卷九十六
七

詳校官庶吉士_臣陳若霖

主事_臣呂雲棟覆勘

總校官檢討_臣何思鈞

校對官學正_臣翁樹棠

謄錄監生_臣王茂源

欽定四庫全書

誠齋集卷九十六

宋 楊萬里 撰

解

天問天對解引

予讀柳文每病於天對之難讀少陵曰讀書難字過然則前輩之讀書亦有病於難字者耶病於難前輩與予同之初病於難而終則易焉予豈前輩之敢望哉因取

離騷天問及二家舊注釋文而酌以予之意以解之庶
以易其難云

天問天對解

屈原問柳宗元對

問曰遂古之初誰傳道之上下未形何由考之

遂古往古也太古天地未分之說傳之者誰何以考

究

對曰本始之茫誕者傳焉鴻靈幽紛曷可言焉

古蓋茫乎其不可考也傳其有初者虛誕者為之也

鴻荒靈怪幽深紛紊何可得而言哉言且不可得而
言也考曷得而考也耶

問曰冥昭瞢闇誰能極之馮翼惟像何以識之明明闇
闇惟時何為

日月之夜冥晝昭何以然也其理瞢然而闇誰能窮
極之者天地之馮馮而盛滿萬形之翼翼而衆多何
以然也其像初誰識而命之者人物之明明鬼神之
闇闇是又誰為之者時是也馮馮盛滿翼翼衆也見

顏師古漢書禮樂志桂華馮馮翼翼註

對曰習黑晰眇往來屯屯厖昧草化惟元氣存而何為

焉

習音忽

習爽昭晰而為晝昏黑窈眇而為夜蓋日往月來月
往日來自爾而已屯屯而昧焉則冥昭瞢闇之理蓋
不可得而窮極也二儀之盛滿者自盛滿爾萬形之
衆多者自衆多爾人物之明明者自明明爾鬼神之
闇闇者自闇闇爾倏焉而草泯焉而化此其厖昧之

氣象蓋不可得而測識也日月晝夜之由不可窮也
天地人物鬼神之由不可識也又孰有為之者哉蓋
亦強名之曰惟元氣存而已習爽見漢郊祀志謂昧
爽也

問曰陰陽三合何本何化圜則九重孰營度之惟茲何
功孰初作之

獨陰不生獨陽不生獨天不生三合然後生此穀梁
子之言也陰陽三合若之何而本原若之何而化生

天體之圓也孰與之營造而能圓天重之九也孰與之量度而有九凡如此者奚而功誰之作哉

對曰合焉者三一以統同吁炎吹冷交錯而功无營以

成沓陽而九轉輾

音火

渾淪蒙以圓号冥疑玄釐无功无

作

陽陰之合以三而元氣統之以一炎者元氣之吁也冷者元氣之吹也吁而吹吹而吁炎而寒寒而炎交錯而自爾功者也其始無本其末無化天之九重者

陽數之合沓而積者爾天之園體者一氣轉輪而渾
茫者爾烏有所營烏有所度哉其凝而結也冥然而
凝莫見其所以凝其釐而治也玄然而釐莫見其所
以釐烏有所功烏有所作哉蒙加也號名也天之園
亦豈真園耶人不見其際而見其園故加之以園之
名而已故曰蒙以園號

問曰幹維焉繫天極焉加八柱何當東南何虧九天之

際安放安屬

音注又
音樹

天維之幹旋何所繫綴天地之垠涯又何所加八柱
九天亦同此問也

對曰烏僣繫維乃縻身位无極之極滯彌非垠或形之
加孰取大焉皇熙疊疊胡棟胡宇完離不屬焉恃夫八
柱无青无黄无赤无黑无中无旁烏際乎天則

天有繫以維則羈縻其體與位矣天無待於繫者也
天有極以加則有形而不大矣天無極而大者也皇
熙者天大而廣也天廣大而疊疊不息不棟不宇全

然離物而無所連屬豈有八山為柱之恃哉九天者
東曰皞天東南曰陽天南曰赤天西南曰朱西曰成
西北曰幽北曰玄東北曰鸞中央曰鈞天也天無色
而亦無方豈有九天之涯際哉

問曰隈隅多有誰知其數天何所沓十二焉分日月安
屬列星安陳

天地之旁角誰知其衆多之數天運之會合何以有
子丑之辰辰者日月所會也沓合也日月列星亦同

此問

對曰巧欺淫誑幽陽以別元隈元隅昌懣厥列折筭剡
筵午施旁豎鞠明究曛自取十二非余之為焉以告汝
規燬魄淵太虛是屬恭布萬熒咸是焉託

導音專筵音
廷竹也楚人

折竹以卜
懣莫孔切

巧謂機巧也淫謂巫史之淫瞽也午施者布算於中
而橫也旁豎者布算於邊而直也鞠者推也規者圓
也燬者日也魄者缺也淵者月也日者火之精故曰

燬日無缺故曰規燬也月者水之精故曰淵月至望
後生魄則缺故曰魄淵也萬熒者星也蓋天地之列
位有幽陰陽明之別而已烏有所謂隈隅旁角也哉
謂之有隈隅旁角者機巧淫瞽之言欺誑云爾天運
之推移有晝而明夕而曠而已烏有所謂十二辰之
定名也哉謂之有十二辰者卜筮之人折竹施布以
推究晝夜之強名自取云爾然則隈隅之數十二之
名豈天之作為哉是皆非天之所作為則屈子以此

問天天亦何以告屈子也故曰非余之為焉以告汝
余者天也汝者屈子也至於日月安屬則有所屬焉
太虛是屬是也列星安陳則亦託於太虛焉故曰咸
是焉託

問曰出自暘谷次於蒙汜自明及晦所行幾里夜光何
德死則又有厥利維何而顧兔在腹

暘谷蒙汜日出入之所也夜光月也

記音祀
暘音楊

對曰輻旋南畫軸奠於北孰彼有出次惟汝方之仄平

施旁運烏有谷汜當焉為明不逮為晦度引久窮不可
以里燬炎莫儼淵迫而魄遐違乃專何以死育玄陰多
缺爰感厥兔不形之形惟神是類

輻以喻天體軸以喻天極天運而極不動日之行遡
天而旋以成晝者也彼孰有所謂出孰有所謂次也
哉惟人見其方之仄而東則謂日出而東見其方之
仄而西則謂日次於西彼未始有出次也平施旁運
亦未始有暘谷與蒙汜也當日之所及則為晝而明

不當日之所及則為夜而晦歷家引三百六十五度之說為日之行者其說久則亦窮矣又豈可以里而計哉日之炎也可違而不可並也月迫而並焉則月之光不勝日是以魄而缺焉烏有所謂死月違而遠焉則月之光得以專是以明而盈焉有所謂育月之陰也以缺為體也以陰感陰兔者陰之類也以缺感缺兔者缺之形也

問曰女岐无合夫焉取九子

王逸云女岐神女無夫而生九子

對曰陽健陰淫降施蒸摩岐靈而子焉以夫為

岐女既曰神靈則不夫而子也宜

問曰伯強何處惠氣安在

王逸云伯強疫鬼也惠氣和氣也

對曰怪彌冥更伯強乃陽和順調度惠氣出行時屆時
縮何有處鄉

彌猶彌也更去聲怪而彌怪冥而更冥彌怪與更冥

合此伯強之所以生也和氣既調則惠氣行矣故伯
強緣癘氣而屈惠氣以癘氣而縮者也惠氣以和順
而屈伯強緣和順而縮者也莫非一氣也又烏有伯
強居處之鄉

問曰何闔而晦何開而明角宿未旦曜靈安藏

角東方星也曜靈日也

對曰明焉非闔晦焉非藏孰旦孰幽繆躔於經蒼龍之
寓而廷彼角亢

旦之明不得不明非有所開而明夕之幽不得不幽
非有所藏而幽謂之有經蹕者傳者之繆也彼日之
出於蒼龍之東特寓焉耳豈真以角亢之宿為日之
廷者耶故激其詞曰蒼龍之寓而廷彼角亢乎廷猶
太微三光之廷

問曰不任汨鴻師何以尚之僉答何憂何不課而行之
鴟龜曳銜鮐何聽焉順欲成功帝何刑焉永遏在羽山
夫何三年不施伯禹懷鮐夫何以變化纂就前緒遂成

考功何績初鑿業而厥謀不同洪泉極深何以寘音田之
地方九則何以墳之應龍何畫河海何歷鮌何所營禹
何所成

王逸云汨治也鴻鵠水也師衆也堯放鮌於羽山飛
鳥蟲曳銜鮌而食之三年不施謂不舍其罪也鮌很
愎而生禹禹何以變鮌之愎洪水之淵泉極深禹何
以填塞墳分也九土禹何以能分別禹治水時有神
龍以尾畫導水徑焉萬里曰汨謂亂不任汨鴻者謂

鮌之才不能任治水之事故於鴻水反汨亂奔潰而益甚也書曰鮌堙洪水汨陳其五行王逸東漢人時古文尚書未出故誤爾

對曰惟鮌詭詭

音鏡

鄰聖而孽恒師厖蒙乃尚其圯后惟

帥之難矚頰使試盜堙息壤招

音翹

帝震怒賦刑在下而

投棄於羽方陟元子以肩功定地胡離厥考而鴟龜肆

喙氣孽宜害而嗣續得聖汙塗而渠夫固不可以類眩

躬蹙步橋楯勦踣厥十有三載乃蓋考醜宜儀形九疇

受是玄寶昏成厥孽昭生於德惟氏之繼夫孰謀之式
行鴻下隕厥丘乃降焉填絕淵然後夸於土從民之宜
乃九於野墳厥貢藝而有上中下胡聖為不足反謀龍
智畚鍤究勤而欺畫厥尾

鮪很愎而譎譎故近堯舜之聖而其孽不移師言推
之尚之蓋衆人之蒙而不知其圯族故也后惟師之
難帥疑當作師謂堯難於違衆不得已深曠感頰而
使試焉鮪乃盜堙上帝之息壤以招上帝之震怒故

刑而棄之於羽山堯於是升其子禹以嗣其功以鯀之孽而生禹之聖此如汙泥之生芙蓉豈以類云乎哉鯀之昏禹之昭何害於姒氏之繼豈有所謂厥謀之不同哉行鴻水而下傾之此所以降丘宅土也初無所謂竇洪泉之說也從民之宜而分九土此本於禹之聖而勤也初無所謂龍尾畫之說也為此說者皆欺者為之也左氏傳國武子好盡言以招人過所謂招帝震怒與此招同柳子息壤記云昔之異書有

記洪水滔天鯀竊帝之息壤以堙洪水帝乃令祝融殺鯀於羽郊

問曰康回馮怒地何故以東南傾

馮怒見左傳馮猶盛滿也馮怒者盛怒也王逸云康回共工名也共工與顓頊爭為帝不得怒而觸不周之山天維絕地柱折故東南傾

對曰園燾廓大厥立不植地之東南亦已西北彼回小子胡顛隕爾力夫誰駭汝為此而以恩天極

園燾天也天謂屈原曰天之廓大者亦立於虛而無
所植則地之立豈有植乎地之東南傾亦猶吾之西
北傾也已者天自謂也是地之東南傾莫知其然而
然也豈康回小子之力所能觸而折絕乎誰為是說
以駭汝而汝以此說恩擾天聽也陸賈傳云母久恩
汝為

問曰九河何錯川谷何滂

音戶

東流不溢孰知其故

滂深也

對曰州錯富媪爰定於趾躁川靜谷形有高庠

音解

東窮

歸墟又環西盈脉穴土區而濁濁清清墳壚燥䟽滲渴而升充融有餘泄漏復行器運漑漑又何溢為

水涸者地脉之收水流者地脉之行燥則收衍則流人見其常顯流而窮於東也不知其已陰滲而環於西也人之氣血降而不升則人死矣水者天地之氣血也東而不西流而不收則天地有不死乎然則水之穴於土區也如運行於一器之內漑漑焉爾積而

不運則溢也運而不積則又何溢為哉富媼后土神
也前漢書禮樂志云媼神宴娛趾下也歸墟海也洩
收水流貌

問曰東西南北其修孰多

修長也

對曰東西南北其極無方夫何瀕洞而課校修長

瀕音胡孔

切

問曰南北順隳其衍幾何

隙音妥狹長也衍廣也

對曰茫忽不準孰衍孰窮

問崑崙縣圃其尻安在

崑崙山在西北其顛曰縣圃縣圃上通於天尻古居
字

對曰積高於乾崑崙攸居蓬首虎齒爰穴爰都

乾西北也是崑崙居之方也蓬首虎齒西王母也西
王母居於崑崙

問曰增城九重其高幾里

淮南子崑崙之山其高萬五千里

對曰增城之里萬有五千

五又作三未詳

問曰四方之門其誰從焉西北闢啓何氣通焉

天地四方之門

對曰清溫燠寒迭出於時時之丕革由是而門辟啓以
通茲氣之元

春夏秋冬氣之出者即四方之門也

問曰日安不到燭龍何照

王逸曰天之西北有幽冥無日之國有龍銜燭而照之

對曰修龍口燎爰北其首九陰極冥厥朔以炳

口燎謂銜燭也

問曰羲和之未揚若華何光

羲和日御也若華若木也

對曰惟若之華稟義以耀

若木之光華受日而後光也

問曰何所冬暖何所夏寒

對曰狂山凝凝冰于北至爰有炎洲司寒不得以試

凝音嶷北有冰山故夏寒南有炎洲故冬暖

問曰焉有石林何獸能言

石山無木猩猩能言

對曰石胡不林往視西極獸言嚶嚶人名是達

西極有不木之山

問曰焉有虬龍負熊以遊

王逸云角曰龍無曰虬有無角之龍負熊獸以遊

對曰有虬蜺蛇不角不鱗嬉夫玄熊相待以神

言有此二物相須而為神怪也

問曰雄虺九首儵忽焉在

王逸云虺蛇也儵忽電光也

對曰南有怪虺羅首以噬儵忽之居帝南北海

莊子南方之帝曰倏北方之帝曰忽王逸以為電非也

問曰何所不死長人何守

王逸云括地象曰有不死之國長人防風氏又長狄也

對曰員丘之國身民後死封嶠之守其橫九里

防風氏身長九里

問曰靡萍九衢泉華安尻

王逸云萍水草而生於九衢之路泉麻也

對曰有萍九岐厥圖以詭浮山孰產赤華伊泉

舊注山海經多言其歧五衢又云四衢衢岐也王逸
以為生九衢中恐謬又浮山有草焉其葉如麻赤華
即泉華也華即花字

問曰靈蛇吞象厥大何如

山海經南方有靈蛇吞象三年然後出其骨

對曰已蛇腹象足覲厥大三歲遺骨其修已號

足見其大稱其長也號稱也

問曰黑水玄趾三危安在

玄趾三危皆山名黑水出崑崙

對曰黑水滔滔窮於不姜玄趾則北三危則南

不姜未詳蓋地名也

問曰延年不死壽何所止

仙也

對曰仙者幽幽壽焉孰慕短長不齊咸各有止胡紛華

湯汗而僭謂不死

名生而實死也

問曰鮫魚何所魃堆焉處

鮫音陵
魃音祈

王逸云鮫魚鮫鯉也四足出南方魃堆奇獸也

對曰鮫魚人貌邇列姑射魃雀峙北號惟人是食

舊注山海經鮫魚在海中近列姑射山堆當為雀魃

雀在北號山如雞虎爪食人王逸誤注

問曰羿焉殛日烏焉解羽

羿音羿
殛音畢

淮南子堯時十日並出堯令羿射中九日日中九鳥
皆死墮其羽翼

對曰焉有十日其火百物羿宜炭赫厥體胡庸以枝屈
大澤千里羣鳥是解

舊注山海經大澤千里羣鳥之所解問作鳥字當為
鳥後人不知因配上句改為鳥

問曰禹之力獻功降省下土四方焉得彼僉山女而通
之於台桑閔妃匹合厥身是繼胡維嗜不同味而快鼂

飽啓代益作后卒然離蠻何啓維憂而能拘是達皆歸射鞠而无害厥躬何后益作革而禹播降啓棘賓商九辯九歌何勤子屠母而死分竟地

金音涂
鼃音朝

鼃早也與朝同離遭也蠻音孽憂也台桑地名也拘

隔也射行也鞠音鞠窮也謂有扈氏之所行皆窮惡

也棘陳也賓列也商宮商也九辯九歌啓所作樂也

屠膺剝也王逸云禹膺剝母背而生其母之身分散

竟地

朱熹曰啓棘賓商當作啓夢賓天如秦穆公趙簡子夢上賓于鈞天九奏萬舞也古篆書夢字

似棘天

字似商

對曰禹懲於續衿婦亟合胙離厥膚三門以不胝呱呱
之不盡而孰圖厥味卒燥中野民攸字

一作字

攸暨彼呱

克臧俾姒作夏馱后益於帝諄諄以不命復為叟耆昌

戚昌孽呱勤於德民以乳活危仇厥正帝授柄以撻兇窮

聖庸夫孰克害益革民艱咸粲厥粒惟禹授以土爰稼

萬億違溺踐垵休居以康食姑不失聖天

一本無聖天

胡往

不道啓達厥聲堪輿以申辨同容之敘帝以賀嬪禹母

產聖何謫厥旅彼淫言亂嚼聰職以不處

禹懲創於無嗣故亟娶於塗山爾豈以慾哉彼股無
腓而不恤也三過門而不視也眡即眊字啟呱呱而
不傷也而孰圖於世味之慾哉惟禹之用心如此故
卒能援天下之濕而置之於燥字天下之民而置之
於安暨猶暨也暨者安也彼呱克臧者呱謂啓也啓
能為善故使姒氏為夏國而不使伯益得以代夏國
且禹之薦益於天非不至也而天諄諄命之不歸於

益者以啓之克臧故也益雖不受命然不失為夏之
老臣益又何戚於已何孽於夏哉啓既受命而勤於
德故民得以乳活也且啓之德正有扈氏不正也以
不正而讎正天之所以授啓以征伐之柄以撻之也
兇之必窮聖之必功天之理也孰能害聖哉庸功也
且夫伯益革民之艱食而使之粒食雖益之功也授
天下以平土而得以稼出天下於既溺而踐履於堅
土彼息天下之居而康裕天下之食者實禹之功也

均者堅土也食者食廩之食也禹之聖如此而啓又
且不失禹之聖則天命胡往而不導之哉姑者且也
道者導也啓達厥聲堪輿以呻謂啓能作九辯九歌
以達樂之聲而天地之間莫不歌詠之也呻者吟也
辨同容之敘帝以賢嬪者何也容者和也大樂與天
地同和啓之九辯九歌能分別其與天地同和始終
先後之序則啓之樂大矣故能與天之和相贊易而
易地皆和也與天之和相嬾配而無不齊也賢者易

也嬪者配也帝者天也禹母產聖何謳厥旅言禹母之產禹也初無副剝母背之怪詩曰不圻不副副與謳同音逼拍切旅者背也旅與膂同謂禹生之怪者淫瞽之言出於妄亂者之口而已聰者割耳而不聽此語也噉音晝口也聃耳也聰聃猶曰洗耳云

問曰帝降夸羿革孽夏民胡羿射夫河伯而妻彼雒嬪馮珖利決圭豨是射何獻蒸肉之膏而后帝不若浞娶純狐眩妻爰謀何羿之射革而交吞揆之

帝降夸羿革孽夏民者言天降后羿以篡夏革命而為夏民之孽也胡射夫河伯而妻彼雒嬪者河伯化為白龍羿何射眇其左目也羿又夢與雒水神宓妃交馮珖利決封禪是射者馮恃也珖弓名也音姚封禪神獸也言不德惟恃其弓以射神獸為田獵之娛也何獻蒸肉之膏而后帝不若者言無德以事天獻封禪之膏以祭天故帝不順不享也浞娶純狐眩妻爰謀者羿之相寒浞娶於純狐氏女眩感愛之遂與

浞謀殺羿也何羿之射革而交吞揆之者言羿以射
革命宜其強也何為寒浞輩交起而吞滅之

對曰夸羿滔淫割更后相夫孰作厥孽而誣帝以降震
皞厥鱗集矢於皖肆叫帝不諶失位滋嫚有洛之嫫焉
妻於狡夸夫

一作失

快殺鼎穉以慮飽馨膏腴帝叛德恣

力胡肥台舌喉而濫厥福寒讒婦謀后夸卒戕荒棄於
野俾姦民是臧舉土作仇徒怙身弧

虞人之箴曰在帝夸羿冒於原獸羿既滔淫荒急割

絕夏后相而更代之此羿之自作孽也奈何誣以為
天降之乎震皞厥鱗集矢於皞者言河伯化為白龍
其鱗皞皞不深居而妄出自取矢之集其目也皞者
明星也謂龍之目如星之明也左傳云集矢於其目
肆叫帝不諶失位滋嫚者言河伯為羿所射上訴天
帝乞帝殺羿而帝不允蓋訴之不誠故帝責河伯曰
汝深守則羿何從而犯也河伯失水之位而妄出宜
乎遭羿之嫚侮也有洛之嫫焉妻于狡嫫美也言洛

妃之美焉肯妻于羿之兇狡也夸夫快殺鼎豨以慮
飽者言羿自矜其以殺為快故射封豨為鼎實以自
飽也馨膏腴帝叛德恣力胡肥台舌喉而濫厥福者
謂羿以豨膏腴之香而祭天帝無德而恃力故帝不
享之帝若曰何肥甘我舌喉以僭濫求福也台音怡
我也寒讒婦謀后夷卒戕荒棄于野俾姦民是臧者
言寒浞伯明氏讒子弟也而夸羿以姦民為善人信
其讒而相之宜浞與其婦謀羿歸自田殺而烹之棄

骨於野者以姦民為臧之故也舉土作仇徒怙身弧
者舉率土與羿為仇而羿不之知方且徒恃其身之
力與弧矢之能而已恃身而不恃民恃藝而不恃德
此其亡也

問曰阻窮西征巖何越焉化為黃熊巫何活焉咸播秬
黍莆藿是營何由并投而鮐疾修盈

阻窮西征岩何越焉者言堯放鮐于險阻窮荒之地
使之西行而度越岩險也化為黃熊巫何活焉者言

化而為黃熊入于羽淵雖有巫醫不能活也熊音奴
來切三足鼈也見國語咸播秬黍莆藿是營者言禹
能平水土使民得播黑黍於莆藿棘茨之地變蕪為
田也何由并投而鮠疾修盈者由用也投棄也言何
用禹而棄鮠耶豈以鮠疾惡修長而貫盈耶

對曰鮠殛羽宕化黃而淵子宜播殖穡於丘于川維莞
維蒲維菰維蘆丕徹以圖民以謹以都堯酷厥父厥子
激以功克碩厥嗣後世是郊

禘王篇云幼禾也子謂鮒之子禹也莞蒲菰蘆之地
皆大徹去其蕪穢以圖農功民謹悅而美之也都美
也堯酷其父而禹能憤激以成功用能碩大其後嗣
以有天下而鮒乃得配上帝於郊祀也

問曰白蜺嬰霓胡為此堂安得夫良藥不能固臧天式
從橫陽離爰死大鳥何鳴夫焉喪厥體

蜺雲之似龍者第雲之似蛇者白蜺與第氣相嬰胡
為在此祠堂乎此原之所見也安得夫良藥不能固

臧者崔文子學仙於王子喬子喬化為白蜺而嬰茀
持藥與文子文子驚怪引戈擊蜺因墮其藥視之則
子喬之尸也言得藥不善也天式從橫陽離爰死者
言天法陰陽從橫陽氣去則人死也大鳥何鳴夫焉
喪厥體者崔文子取子喬之尸覆之以敝筐須臾化
為大鳥而鳴飛而去言文子焉能亡子喬之身也

對曰王子怪駭蜺形茀裳文褫操戈猶惜夫藥良終鳥
號以游奮厥篚筐習漠莫謀形胡在胡亡

文褫操戈者褫音斯福也又褫祁宮名二義皆與此
句不通褫恐當作褫音直爾切奪衣也謂文子見子
喬蜺形裼裳而魂魄驚怖褫奪遂操戈以擊之也芻
漠莫謀謂明爽昏黑莫得而究也形胡在胡亡存亡
亦不可得而推也

問曰萍號起雨何以興之

萍萍翳雨師名也雨師號呼則雨興何以然也

對曰陽潛而鬯陰蒸而雨萍馮以興厥號爰所

陰陽蒸炊而雨爾彼萍翳特馮藉以起而號呼其所也非號而後雨也

問曰撰體脇鹿何以膺之

天撰十二神鹿一身八足兩頭何以受此形

對曰氣怪以神爰有奇軀脇屬支偶尸帝之隅

氣怪且神故生此奇怪之身脇合為一而支分為八以主天之方隅也

問曰鼇戴山抃何以安之釋舟陵行何以遷之

鼃大龜也擊手曰抃巨靈之鼃背負蓬萊山而抃戲于海何以能安龜負山若舟使龜捨水而行於丘陵何能遷徙此山乎

對曰宅靈之背掉焉不危鼃厥首而恒以恬夸要釋而陵殆或謫之龍伯負骨帝尚窄之

丘即蓬丘也宅于巨靈之背而不危且恬安平夸也欲釋水而陵者天若謫譴以居陵何不可之有龍伯國人一釣而連六鼃帝尚以為窄而不足夸也

問曰惟澆在戶何求於嫂何少康逐犬而顛墮厥首女
岐縫裳而館同爰止何顛易厥首而親以逢殆

澆多力論語曰澆盪舟至其嫂之戶佯有所求而遂
淫其嫂少康因獵放犬遂襲澆而斷其首女岐即澆
嫂也假縫裳而同室也少康初以夜襲得女岐頭誤
以為澆故言易厥首

對曰澆嫪以力兄麇聚之康假於田肆克宇之既裳既
舍宜咸墜厥首

澆淫且力也故曰嫪以力

問曰湯謀易旅何以厚之覆舟斟尋何道取之桀伐蒙
山何所得焉妹嬉何肆湯何殛焉

湯謀變夏衆以從己以何恩厚之而得其從也少康
滅斟尋氏易若覆舟何道以取也桀伐蒙山之國而
得妹嬉肆其情意而湯殛之

對曰湯奮發旅爰以嫪拊載厥德於葛以詰仇餉康復
舊物尋焉保之覆舟喻易尚或艱之惟桀嗜色戎得蒙

妹淫處暴娛以大啟厥伐

湯之奮興而變夏衆以煦嫗拊摩而得之自葛始以
誅仇餉也少康復舊物故斟尋安得而保其國其易
如取如攜爾以覆舟喻之猶為難也湯之殛桀非湯
也桀自淫自暴以啟之

問曰舜閔在家父何以鰥堯不姚告二女何親厥萌在
初何所意焉

舜憂其家而其父何以使舜之鰥堯不告舜父母故

得相親也

對曰瞽父仇舜鰥以不儷堯專以女茲俾胤厥世惟蒸
蒸翼翼于媯之汭

瞽不可告故堯自專而女焉女去聲

問曰璜臺十成誰所極焉

紂作玉臺十重

對曰紂臺于璜箕克兆之

紂初作象箸箕子歎之知必至於玉杯必盛熊蹯豹

胎則璜臺之兆箕子知之久矣

問曰登立為帝孰道尚之

天子之登立誰開道而宗尚之

對曰惟德登帝帥以首之

德則為帝天下相帥而推以為元首

問曰女媧有體孰制匠之

女媧人頭蛇身一日七十化其體如此誰制匠而圖

之

對曰嫗軀虺號占以類之胡日化七十工獲詭之

相傳其蛇身則以蛇占之而圖以類之也豈有化七十之說皆畫工詭異而為之爾

問曰舜服厥弟終然為害何肆犬豕而厥身不危敗舜卑以服事其弟而象欲害舜肆其犬豕之心而不能危敗舜之身也

對曰舜弟眡厥仇畢屠水火夫固優游以聖而孰殆厥禍犬斷于德終不克以噬昆庸致愛邑鼻以賦富

舜之弟眡舜如仇浚井則屠之以水焚廩則屠之以
火象如犬之自斷斷爾烏能禍舜而舜盡其兄之道
用之為諸侯以致其愛邑之於有鼻以富其給

問曰吳獲迄古南岳是止孰期去斯得兩男子

自古公之子有吳太伯而太伯採藥南岳止而不還
以讓周於王季兩男子謂太伯仲雍二人皆去吳孰
相期而使之去也

對曰嗟伯之仁遜季旅岳雍同度厥義以嘉吳國

太伯之仁遜王季而羈旅於南岳仲雍實同此高義
以成吳國之美德音鐸

問曰緣鵠飾玉后帝是享何承謀夏桀終以滅喪帝乃
降觀下逢伊摯何條放致罰而黎伏大說

后帝湯也伊尹因緣烹鵠羹飭玉鼎以事湯湯賢之
以為相遂承用尹之謀而謀桀桀遂滅亡又云湯出
觀風俗而逢伊尹遂放桀于鳴條而黎民大伏

對曰空桑鼎殷諂羹厥鵠惟軻知言賾焉以為不仁易

愚危夫曷揆曷謀咸逃叢淵虐后以劉降厥觀于下匪
摯孰承條伐巢放民用潰厥疣以夸于膚夫曷不謠

伊尹生于空桑負鼎干湯羹鵠以諂此皆妄說也惟
孟子知言視之以為不也矚視也音胡澗切不音方
鳩切湯之伐桀以至仁而草易至愚至危之桀又曷
用揆度而計謀哉桀之于湯為叢毆爵為淵毆魚者
也民皆逃鷙獺而歸叢淵此虐君之所以為湯虐劉
也劉殺也湯觀於天下未有如伊尹者非尹孰承用

哉伐桀於鳴條而放之南巢如為民潰其身之瘡疣而平夸其肌膚也曷不悅而歌哉

問曰簡狄在臺嚳何宜玄鳥致貽女何喜

簡狄帝嚳妃也簡狄侍帝嚳於臺上有燕墮卵吞而生契

對曰嚳狄禱禱契形于胞胡乙敵之食而怪焉以嘉言契以禱而生不以燕之怪

問曰該秉季德厥父是臧

對曰該德脣考

一作考

蓐收于西爪虎手鉞尸刑以司慝

少皞氏之子熙為玄冥該為蓐收言該之德能嗣於父故列於神以主天地之刑以司天下之惡也

問曰胡終弊于有扈牧夫牛羊

有扈澆國名也澆滅夏國相相之子少康為有仍牧正典牛羊後殺澆滅扈以復夏

對曰牧正矜矜澆扈爰踣

少康以戒懼興有扈以驕淫亡

問曰干協時舞何以懷之

對曰階干以娛苗革而格不迫以死夫胡狃厥賊

舞干羽以格有苗不在於干羽也緩其死而開生生則苗民何狃於為盜而不懷

問曰平脇曼膚何以肥之

紂宜憂亡者也憂則臞矣而肥何也

對曰辛后騃狂亡憂以肥肆蕩弛厥體而充膏于肌膚寶被躬焚以旗之

不憂故肥以貪故自焚紂衣其珠玉赴火而死武王
斬之懸其頭於大白之旗

問曰有扈牧豎云何而逢

一作其
爰何逢

擊床先出其命何從

夏啟時有扈氏本牧豎何逢而得侯及啟攻之親擊
殺之於床

對曰扈釋于牧力使后之民仇焉寓

一作
寓

啟床以斮

扈以力而侯故失民心而無所居

問曰恒秉季德焉得夫朴牛何往營班祿不但還來

湯能常秉契之末德出獵得大牛之瑞湯獵而還以禽遍班祿惠于百姓不但往還田獵而已

對曰殷武踵德爰獲牛之朴夫惟陋民是冒而丕號以瑞卒營而班民心是市

湯能踵契之德以得天下者實也班禽而得牛者非也此陋民蒙冒而稱其瑞小惠是班以市民心湯豈在是哉

問曰昏微遵迹有狄不寧何繁鳥萃棘負子肆情

晉大夫解居父聘于吳過陳之墓門見婦人負其子
欲強暴焉婦人引詩刺之曰墓門有棘有鴉萃止獨
不愧鴉乎言循闇微之迹而有夸狄之行不可以寧
其身

對曰解父狄淫遭慙以報彼衷之不目而徒以色視
以解父之強暴而遭陳婦之正言安得而不愧報乎
此解父不見陳婦之心而見其色者也

問曰眩弟並淫危害厥兄何變化以作詐後嗣而逢長

象眩惑其父以危害其兄而子孫久長君有鼻何也
對曰象不兄龔而奮以謀蓋聖孰凶怒嗣用紹厥愛

象不恭其兄而謀危其兄此象之凶也然舜之聖豈
怒其凶哉不藏怒而親愛之此象之嗣所以繼紹而
久長皆舜之親愛所延也

問曰成湯東巡有莘爰極何乞彼小臣而吉妃是得水
濱之木得彼小子夫何惡之媵有莘之婦湯出重泉夫
何臯尤不勝心伐帝夫誰使挑之

湯巡有莘而得妃有莘惡伊尹生于空桑故使之送女也重泉地名也桀拘湯於重泉何罪也湯不勝民心而伐桀桀自挑之

對曰莘有玉女湯巡爰獲既內克厥合而外弼于德伊知非妃伊之知臣曷以不識胡木化于母以蝎厥聖喙鳴不良謾以詭正盡邑以墊孰譯彼夢湯行不類重泉是因違虐立辟實罪德之由師馮怒以割癸挑而讐

伊尹之聖智豈待湯之妃而後達哉以伊尹聖智之

臣湯何以不識言湯自識之也伊尹母妊身夢神女告之曰白竈生鼃亟去毋走其邑盡為大水母溺死化為空桑有兒啼人取養之即伊尹也柳子曰或者為是說以蠹伊尹之聖也為是說者不良之人欺謾以害正道也盡邑皆溺果孰傳此夢哉其誕也必矣湯之行不類於桀故桀囚之衆怒桀之囚湯而割夏實夏癸自挑之以致仇爾

問曰會鼃爭盟何踐吾期蒼鳥羣飛孰使萃之列擊紂

躬叔旦不嘉何親揆發定周之命以咨嗟授殷天下其
位安施反成乃亡其罪伊何爭遣伐器何以行之並驅
擊翼何以將之

武王將伐紂紂遣膠鬲視師膠鬲問曰欲以何日武
王曰甲子日還報會大雨道難武王曰吾甲子日不
至紂必殺膠鬲吾欲救賢者之死蒼鳥鷹也言武王
之將帥如鷹之羣飛此孰聚之者白魚入舟周公曰
雖休勿休故曰叔旦不嘉爭遣伐器者伐紂之器爭

先也並驅擊翼者三軍爭先奮擊其翼也

對曰膠鬲比糜雨行踐期捧盞救灼仁興以畢隨鷹之
咸同得使萃之頸紂黃鉞旦孰喜之民父有釐嗟以美
之位庸庇民仁克蒞之紂淫以害師殛圯之咸這厥死
爭徂器之翼鼓顛禦讎舞靡之

糜沫也紂將殺膠鬲而為沫矣故武王如期而往如
捧盞水以救焚灼顛禦未詳糜音禧

問曰昭后成遊南土爰底厥利惟何逢彼白雉穆王巧

梅夫何為周流環理天下夫何索求妖夫曳銜何號乎
市周幽誰誅焉得夫褒姒

周昭王南遊以越裳氏不獻白雉親往逢迎之為楚
人所沈梅貪也妖夫者周幽王前世有童謠曰壓弧
箕服寔曰周國後有夫婦賣此器者以為妖執而曳
戮之於市夏之衰有二龍止於夏庭而言曰予褒之
二君也夏后布幣糈而告之龍亡而縈在櫝而藏之
至周厲王之末發而觀之縈流於庭化為玄黿入後

宮處妾遇之而孕生子棄之被戮之夫婦聞啼聲哀而收之奔褒褒人後獻此女是為褒姒梅音每

對曰水濱翫昭荊陷弑之繆迺越裳疇肯雉之穆懽祈招猖佯以遊輪行九野惟怪之謀胡紿娛戴勝之獸觴瑤池以迭謠孺賊厥詵爰繫其弘幽禍挐以夸憚褒以漁淫嗜蕞殺諫尸謁屠孰鱗聚以徵而化龜是辜

孺一作儒

祈招之詩見左傳西王母虎骨戴勝觴穆王於瑤池之上為王謠其詩曰白雲見列子孺賊厥詵音參

疑作說言幽王以侵漁其民而已以淫於嗜慾而已
以輕殺諫臣而已豈有歸咎於龍螭化龜之說與夫
厲弧之謠哉此世儒繆說害之也

問曰天命反側何罰何佑齊桓九會卒然身殺

齊桓一人之身而始乎九合諸侯終乎一身不保天
命之佑與罰何不常也

對曰天邈以蒙人么以離胡克合厥道而詰彼尤違桓
號其大任屬以傲幸良以九合逮孽而壞

天遠而幽人小以散何可以合天人而論之又從而責其罰佑之不常哉齊桓之事皆自取爾天何與焉挾其大以號令天下而忽於屬任之人故幸而得良臣則能成九合之功乃不幸而遭嬖孽小人則壞矣皆人事非天命也

問曰彼王紂之躬孰使亂惑何惡輔弼讒譖是服比干何逆而抑沈之雷開元何順而賜封之何聖人之一德卒

其異方梅伯受醢箕子佯狂

調音閭
梅音浼

雷開紂之佞臣也聖人文王也

對曰紂無誰使惑惟志為首逆國倒視輔讒以寵于異
召死雷濟克后文德邁以被芮鞠順道醢梅奴箕咸喪

以醜厚

于疑作干
比干也

紂誰使之惑哉志使之爾志使之惑故倒行逆施惟
讒是寵比干以異已而死雷開以同惡相濟而侯也
文王行德以被天下故虞芮之訟順之紂以醢梅伯
之直奴箕子之忠故忠良皆喪而醜德愈厚

問曰稷維元子帝何竺之投之於冰上鳥何燠之何馮
弓挾矢殊能將之既驚帝切激何逢長之伯昌號衰秉
鞭作牧何令徹彼岐社命有殷國遷藏就岐何能依殷
有惑婦何所譏受賜茲醢西伯上告何親就上帝罰殷
之命以不救師望在肆昌何識鼓刀揚聲后何喜武發
殺殷何所悵載尸集戰何所急

鞭喻政也

殊能將之謂后稷有將相之才也帝謂紂也武王承
稷之業誅紂而切激數其過也伯昌文王也紂號令

既衰文王執政以為州牧也徹彼岐社者武王誅紂
徹去邠岐之社而為天下大社也遷藏就岐言文王
徙其寶藏來就岐下也受賜茲醢者文王受紂所賜
梅伯之醢以祭告於上天也師望呂望也在肆鼓刀
文王問之對曰下屠屠牛上屠屠國文王喜載以歸
也載尸者武王載文王木主以伐紂也馮音憑

對曰棄靈而功篤胡爽焉翼冰以炎盍崇長焉既岐既
疑宜庸將焉紂凶以啟武紹尚焉伯鞭於西化江漢潁

易岐社以大國之命以祚武踰梁橐囊羶仁萃蟻姐滅
淫商痛民以亟去肉梅以頌烏不台訴孰盈癸惡兵躬殄
祀牙伏牛漁積內以外萌岐目厥心瞭眊顯光奮刀屠國
以髀髓厥商發殺曷逞寒民于烹惟粟厥文考而虔予以徂征
易岐社以大者易一國之社為天下之大社也踰梁
橐囊者詩所謂于橐于囊也羶仁萃蟻者文王遷岐
而民從之其仁如羶其萃者如慕羶之蟻也羶蟻見
莊子烏不台訴者台音怡我也我者天自謂也言紂

肉梅伯以為醢而頒諸侯諸侯焉有不訴於天者哉
大抵屈原天問原之問天也柳子天對柳子代天而
答原也孰盈癸惡者言紂之惡盈於夏癸故兵其躬
而殄其祀也牙伏牛漁者姜子牙隱伏於屠釣非真
屠釣也其隱於內而見於外惟文王能見其心甚明
故太公樂為之用屠商如屠牛之髀臠也髀臠見賈
誼傳發殺曷逞寒民于烹者武王之殺紂非有憤悒
而逞也出民於烹熬之中而置之寒涼之地而已惟

栗厥文考者栗當作栗武王曰予克紂惟朕文考無
罪武王祇栗文考之靈故伐商也而虔予以徂征予
亦天自謂也武王之伐商下畏文王上畏天命故徂
征爾又栗者文王之木主也以栗木為主也虔予一
作虔子言虔其子道以徂征也禮小祥以栗為主
問曰伯林雉經維其何故何感天抑墜夫誰畏懼

伯長也林君也晉太子申生雉經也墜古地字

對曰中譖不列恭君以雉胡蠃訟蜋賊而以變天地

恭太子為驪姬譖之于內而不得陳列也死者如蜉
之訟譖者如蜮之賊爾此安能感天地柳子之論大
抵以天人為不相關以天理為漠然無知皆憤懣狠
忮之所發非正論也

問曰皇天集命惟何戒之受禮天下又使至代之

天命王者何以有易姓

對曰天集厥命惟德受之胤怠以弃天又佑之

德則界怠則奪也天又佑之言不祐也

問曰初湯臣摯後茲承輔何卒官湯尊食宗緒

湯初臣伊尹後乃師承之何卒使湯官天下而垂緒
官天下謂王天下也

對曰湯摯之合祚以久食昧始以昭末克庸成績

臣之茲謂昧承之茲謂昭

問曰勲闔夢生少離散亡何壯武厲能流厥嚴

吳王壽夢生諸樊生闔廬少放在外及壯而厲其武
以流其威

對曰光徵夢祖憾離以厲仿徨激覆而勇德益邁
惟其憾於離散是以厲其威武

問曰彭鏗斟雉帝何饗受壽永多夫何久長

彭鏗彭祖也進雉羹於帝堯壽八百歲猶自悔不
壽恨枕高而唾遠

對曰鏗羹于帝聖孰嗜味夫死自暮而誰饗以俾壽
其死自晚爾豈有饗其羹而使之壽者

問曰中央共牧后何怒蠹蛾微命力何固

牧草名也中州有岐首之蛇爭共食牧草自相噬

對曰蝮螫已毒不以外肆細腰羣螫夫何足病

蝮胡對切蠶蛹也

問曰驚女采薇鹿何祐北至回水萃何喜

昔有女子采薇驚而走至回水之上止而得鹿家遂

昌有福喜也

對曰萃回偶昌鹿曷祐以女

其昌偶然鹿何為焉

問曰兄有噬犬弟何欲易之以百兩卒無祿

秦伯有犬弟鍼請之百兩謂車也魯昭公元年秦鍼奔晉其車千乘坐車多故出奔

對曰鍼欲兄愛以快侈富愈多厥車卒逐以旅

以多車而卒為旅人於晉也

問曰薄暮雷電歸何憂厥嚴不奉帝何求伏匿穴處爰何云荆勲作師夫何長悟過改更我又何言吳光爭國久余是勝何環穿自閭社丘陵爰出子文吾告堵敖以

不長何試上自予忠名彌彰

王逸曰屈原放逐見楚有先王之廟及公卿祠堂圖畫天地山川神靈及古賢楚人因論述之故其文義不次叙云薄暮雷電原所問略託日暮欲去天雨電也厥嚴不奉者楚王之威日墮不可復奉雖求福於天無如之何也伏匿穴處者原將退伏巖穴復何言也荆勲作師者言楚先王之功與楚之衆將亡而不長久也悟過改更者言楚王能悟而改則又何言也

吳光爭國久余是勝者言楚嘗為闔廬所勝不可不
戒也環閭穿社爰出子文者原見楚將亡而無賢人
以救之故思得如楚先王時賢臣令尹子文也吾告
堵敖以不長者楚人謂未成君而死者曰敖堵敖者
楚文王兄也原哀懷王將如堵敖不長而死以此告
之也何試上自子忠名彌彰者言原何敢嘗試其君
自號忠直之名以彰於後世乎誠以同姓義不容已
也

對曰咨吟于野胡若之很嚴墜諠殄丁厥任合行違匿
固若所咿嘸忿毒意誰與醜齊徂秦啗厥詐讒登狡庸
咈以施甘恬禍凶亟鋤夸愎不可化徒若罷闔綽厥武
滋以侈頽於菟不可以作怠焉庸歸款若教之闕以旅
尸誠若名不尚曷極而辭

言原之咨吟於楚何其很然懣懣而不釋也楚之威
將墜而諠將殄自有當其任者道合則行道違則匿
固其所也原之咿嘸忿毒意欲與誰合哉楚與齊久

交而絕之與秦宿讎而往朝之餌於秦之詐而不自
悟也讒者登之狡者用之楚之政所以逆理拂衆而
施也禍凶且至而甘於處鋤滅不遠而恬於翫此其
愎諫固不可化矣原之忠懇憂怛徒自汝疲而已何
救於楚之亡哉闔廬以武而強以侈而頽而況楚哉
於菟子文也原之思子文而子文死矣不可作矣原
其誰與歸也款告也關天關也若敖謂懷王也告懷
王之祚將短矣懷王卒以客死於秦旅客也尸死也

誠若名不尚曷極而辭者言汝之忠名誠不足尚何以窮極汝之忠憤之辭如此乎所以深言忠名之足尚也

誠齋集卷九十六

欽定四庫全書

誠齋集卷九十七

宋 楊萬里 撰

雜著

冊文

代梁丞相作壽聖齊明廣慈備德太上皇后

冊文

維淳熙十二年歲次乙巳十二月一日庚戌朔皇帝臣

欽定四庫全書

諫齋集
卷九十七

謹稽首再拜言曰臣聞五三六經若稽天則勅叙人紀
罔不上昭帝猷內融母德與疇載相永與曦朏相輝是
以書首堯典詩首周南蓋降義迄黃肇允而未具嫔武
狄馭若淑而靡隆君子於是乎謂地道莫盛於唐堯母
德莫加於文母也然上下千載相望遙遙若夫堯父文
母生同昭時參天兩地壽儷太極如日斯升如月斯常
倬乎今日之於鑠者負哉不可得聞已德日新壽日
新則鴻號碩聞又日日新顧可挈而不熙哉恭惟光堯

壽聖憲天體道性仁誠德經武緯文紹業興統明謨盛
烈太上皇帝陛下皇建渾淪再造穹窿更生肖翹重輝
宗祏固天縱之聖神武文獻聰狗齊又多績也厥亦惟
我壽聖齊明廣慈太上皇后徽懿淵穆惠和靜專實左
之右之輔之翼之在河之洲言采其荇闕睢之所以風
天下也莊敬以思謙恭以卑思齊之所以垂徽音也為
締之俗薄澣之服葛覃之所以化婦道也至於求賢如
卷耳逮下如樛木化行如兔置由身而家由家而國由

國而天下母也克仁絜光堯有不殺之武母也克儉絜
光堯有日損之道母也克遜絜光堯有黃屋非心之聖
惟父惟母同道一德惟齊惟鈞光施沖人恩被函生格
于皇天自天壽之有永無艾臣敢不涓選今日盼飾上
儀躬率百工增崇顯名用答揚二親之光訓蓋聖善壽
祺言之不足我是以有明慈之稱光明宣慈言之不足
我是以有廣慈之稱乃齊乃廣言之不足我是以有備
德之稱且厚以持載博而能化德也貫三為一襲六為

八備也衆美會焉萬善叢焉德行純備視周之太任無
所與遜臣不勝大願謹奉玉冊金寶加上尊號曰壽聖
齊明廣慈備德太上皇后伏惟殿下同堯之天合堯之
日對越大養於萬斯年復無無極燕翼右序以篤宋祚
以休于萬嗣臣誠歡誠忭稽首再拜謹言

詞

給太學士人綾紙詞

牒某人成均材之固也言藝其苗言擷其秀既曰擷之

曷不藝之士之入于斯出于斯有碩其用者相踵也庸
非國家養士之仁乎有養士之仁有自養之仁往省毋
怠事須准勅給牒補充太學生故牒

議

光堯太上皇帝諡議

某聞聖人之孝莫大於尊親尊親之至莫大於愛之以
德吾如是而尊之吾親可以受之受之而安居之而無
疑是之謂愛之以德不然極吾之所欲尊而不顧吾親

之所不欲受豈所謂愛之以德乎昔魯之閔僖兄弟也然閔公先君也僖繼閔者也而文公乃躋於閔之上文公知尊其父而不知納其父於非禮之地是則尊其父者陷其父也故春秋書之曰躋僖公譏之也至定公而逆祀始正故又書之曰從祀先公嘉之也然則議者欲尊大行太上光堯皇帝為祖無乃近於躋僖公之類乎兄弟且不可而父子則可乎恭惟太上光堯皇帝以上聖之資當艱難之運而能撥亂世反之正皇建太極再

造兩儀更生烝民重立九廟中興之業魏蕩遂古至於
回龍輜於永祐承太母於慈寧偃兵息民涵育溥博和
戎靖國方內密如紹興辛巳金亮叛盟戎路一征敵兵
自散功成不處斷自天衷褰裳去之以授聖嗣駿功丕
烈赫然如彼道隆德茂卓然如此其視光武無所與遜
皇乎我宋丕天之大律不可貶已尊而為祖何不可者
然葬取漢而亡漢則先漢至平帝而終光武取葬而漢
興則後漢自光武而始國自我始謂之祖可也光武之

於平帝光武所不得而父況非受之於平帝平帝之於
光武平帝所不得而子況非授之於光武親則非父子
也世則非授受也今我光堯親則徽宗之子也位則徽
宗之授也稟父之命傳父之位至於廟號父居其前同
列聖而稱宗子居其後異列聖而稱祖光堯之心其安
乎哉揚雄曰孝莫大於寧親寧親莫大於寧神尊其號
而使其心不安其神不寧可乎今申命公卿大臣議郎
博士僉爾而進質之於天盍亦無變稱宗之制而獨求

極尊之諡庶幾下可以稱吾君愛親以德之美意上可
以安光堯在天之神靈也謹按諡法窮神知化曰聖一
民無為曰神克定禍亂曰武修德來遠曰文禮文法度
曰章繼志述事曰孝夫自天生德聰明仁儉不曰聖乎
內嬪聖子獨觀昭曠不曰神乎赫聲濯靈風揮日舒不
曰武乎投戈舞干裔夷用賓不曰文乎刺經作制興滯
舉偏不曰章乎宗廟再安祀宋配天不曰孝乎昔堯帝
之德乃聖乃神乃武乃文煥乎文章堯之章也親睦九

族堯之孝也惟我太上異時尊號于堯有光厥今易名
備堯六德勤崇垂鴻金聲玉振於是為稱若夫高者天
德之稱也致崇極之謂也詩曰莫高匪天又曰謂天蓋
高惟高之一字乃盡天德惟天下之至聖乃配乎天德
於赫太上其道高乎九皇其功高乎六典其壽高乎三
五六經之傳豈惟堯而已矣非天德其孰能之太上光
堯皇帝尊諡宜天錫之曰聖神武文章孝皇帝廟曰高
宗謹具申尚書省伏乞照會謹狀

葉恭簡公諡議

名義問
字審言

議曰天下有名教聖人有天爵政教莫大乎誅賞而誅有不及於隱慝莫顯乎公卿而爵有不施於幽光諡也者其教不以政而以名其爵不以人而以天者也一字之褒死而不忘片言之貶百世不改是以君子貴之樞密葉公既薨其子某謁于太常考其行實稽之諡法法之所與也謹按諡法不懈于位曰恭正直無邪曰簡合是二者可以易公之名矣公何以謂之恭也紹興之季

年北敵寒盟寇我疆場有為右相而受命督視者逡巡
竟不肯行公入對毅然請行太上皇帝玉音慰諭且謂
卿能為朕行朕復何慮大抵緩則食其祿急則逃其死
為臣如此懈孰甚焉公遇大難而以身任之可謂不懈
于位矣是以謂之恭也何以謂之簡也公自為小吏而
上疏論時宰之姦邪以取免官之譴及執法殿中則論
執政之乖愆必使釋位而去且謂君子當長養成就使
之有立小人當芟奪蘊崇勿使能藝可謂正直無邪矣

是以謂之簡也請諡曰恭簡謹議

節使趙忠果諡議

名士跋

論曰身與義孰重曰義重忠與功孰難曰忠難古人不以天下易兩臂蓋以身重於天下故也然身不可殺乃有殺身以成仁生不可舍乃有舍生而取義君子是以知天下至重之器在義而不在身古人不以九合易一死蓋以功難於濟世故也然以其君霸者或有比之而不悅以其君顯者或有恥之而不為君子是以知天下

至難之業不在功而在忠故節使趙公奮至難之忠而不懼捐甚重之身而無愛功雖不就義則獨高矣矧公神明之胄宗室之英乃與上古之法士仗節死義者爭日月之光凌雪霜之嚴是歲寒之松柏生於高宗之景山疾風之勁草生於文王之靈囿也詩不云乎豈無他人不如我同姓議禮者當正色而諡之夫何疑焉公在靖康之間憤金人之強痛宗國之屯結豪傑三千人以赴京師在建炎之間復結義士數千人以赴京師朝廷

取河北竟以謀泄敵敵人執之斷腰於市嗚呼痛矣謹按諡法殺身報國曰忠犯衆所懼曰果公之義捐一生於衆人貪生之日不亦殺身報國乎宜以忠果為諡謹議

策問

太學私試策問

問錢之為物飢不可食寒不可衣然非天下之無用無以行天下有用是以假之也嘗怪鑄之自於古積之至

於今舊者不足繼之以舌鼓鑄之不足繼之以楮券宜其為錢不勝其為有餘也而反愈不足夫錢之與物無兩重亦無兩輕此賤則彼貴彼低則此昂也今則錢與物兩貴其故安在或謂以楮為之其數十而其用八非細民便此其所以敝也然行之於益州未聞如是之敝彼何術也或謂以銅為之其費不貲蓋與鐵者兩行乎議者曰鐵非銅比也不久且毀有鐵之費無泉之利無以為也然是物也益州亦用之又何歟故鑄可為也其

如權去公上何且楮券之偽者民猶病之故鑄可為不
可為也禁其銷則錢不毀禁其泄則錢不耗是二者固
載之令甲矣然銷之者無藝泄之者不貲何其自若也
或者曰昔者孟子不言利不知夫五雞二彘之育孟子
所不忍也何必曰利孟子有為言之信如或者之說則
王衍亦孟子歟不然時之所憂庸得不憂民之所病庸
得不病諸君獨無意乎美言不補寂言無施諸君必無
為也願悉解有司之惑將有擇焉

省試別頭策問

問道與德可勉而能才不可強而致此蘇氏之論也德勝才謂之君子才勝德謂之小人此司馬氏之論也由前之語則先才由後之說則後才兩從則戾一兩不從則孰歸或曰蘇氏駁乎權司馬粹乎經權則多尤經則寡悔信斯言也仲尼之所謂才難不尚才哉舜之五臣周之十亂不用才哉且司馬之說曰正直中和之謂德聰明果敢之謂才然則才與德之分也昭矣及觀傳稱

高辛氏高陽氏之才子則曰忠肅恭懿又曰齊聖廣淵
傳之所謂才乃司馬氏之所謂德也又何歟諸君且用
世矣於此何嚮有司將觀焉

太學上舍策問

問趨治者固多途經乃謂之道繼乃謂之德濟乃謂之
術就乃謂之功其趨三其就一也唐虞氏粹乎道周人
粹乎德秦人粹乎術漢人駁乎術與德嘗怪二帝之治
執中之稱邇而光被之稱遠精一之稱約而雍熙之稱

博堯曰成功舜曰大功何其卓也及舜以是傳之三聖
文武周公觀周公相成王以治周者豈弟形其心忠厚
洽於物禮樂陶於天下躋矣然呂刑之繁已伏於圉空
之日春秋之戰亦倚於兵寢之年自是而後周弱矣當
周公用此以治魯而君子已逆知其寢微矣周公用於
周而不自知其將弱歟抑知而不改歟且其道未離於
唐虞之所傳而其德非違於道也所傳者無二而所就
者不一何也於是秦人監之絀道以進乎術偃德而向

乎功一用權勢法制以驅其民挈攜其政以歸乎兵與
刑以為吾可以有就則亦奚天下不悅之恤故其究曰
富而富曰強而強為國而濟登茲焉者可也然說者必
曰秦以此始亦以此終其信然耶抑評以成毀而不以
工拙乎夫成毀之於工拙此二事也秦果工於為國則
不以毀廢工不以人拚技且其後之毀庸知其不由工
歟抑其所以毀者果出於其所以成者歟於是漢人監
之高文創守以寬厚公恕之治與天下為清靜和樂之

事然漢無秦之術亦有秦之功朽貫紅粟白老兒嬉秦
未必有也南越請服匈奴和親不為秦之強而亦不至
周之弱武宣繼之則又不然曰高皇遺朕平城之憂曰
何至純任德教周政乎二君之治蓋出乎秦人之所謂
術者矣然一以之虛耗一以之中興事同而功以異此
又何也且夫道與德唐虞不得不帝周不得不弱說者
曰窮於周然奚而不窮於漢之高文乎此尚有可諉者
曰異世至於術秦一秦也由乎前也奚以功由乎後也

奚以毀說者又謂秦之所挾者毀之具也其前之功者
幸也然宣帝復用之而功則又奚說之諉恭惟主上躬
發聖德統攝羣元蓋將攄闔闢天地之治以丕續祖烈
內修之政自治之策必有萬其全也比者紓淮民之勤
蠲江湖之逋復監策脫兵甲卻羨餘戢橫斂飭農功講
水澤藹如之治登周漢而咸唐虞有日矣敢問諸君緊
欲集不世之功則宜術之施然秦之毀武之悔乃有可
懲而秦之強宣之功亦有可計欲建不拔之業則宜道

德之用然周人之弱得無可監而唐虞之隆周漢之永
又有可宗今行其三而並歟擇其一而專歟抑外此而
他之也或曰仲尼之門羞稱乎術或曰仁術不自孟氏
儒術不自荀氏歟願殫議而洽講之將以聞焉

公試武學策問

問天下安注意相天下危注意將非古也危而注意將
是霜裹雨蓑之論也故擇將在素論將在豫嘗試厯選
古昔與諸君論之或謂制勝者不穿札破敵者乘軺車

將豈顓戴鷁哉然洵邑陳濤之役山西之族哂之或又
謂列兵法者若決水轉圜承家學裕父功者乃忠義感
人之燕翼不于其人于其閭也然長平河橋之役非將
種乎彼起屠販為爪牙何必將種乎又或謂謝病頻陽
乃能平楚老者可使也不更事少年亦能破秦可偏廢
哉軍市之租盡給士卒庶者可使也貪而好色亦得士
死力可獨取哉抑不思故將軍而失道尚乳臭而見輕
鬻樵水斂錢帛而資燕晉斯焉取斯嗟乎將固不易知

知將亦未易若曰亡踰老成若曰臣能平之自鬻可嫌
焉能降匈奴者即自當單于之俊困壺頭者即據鞍矍
鑠之老獨何歟或謂戰必勝之將徵信謹守鑰者疇知
之勇可用之將徵經濟大畧者疇識之舉良將大臣事
也然守汝州而禽舉之者誰歟此猶可諉曰文武異科
將相異列也意思深長必禽萬人敵者舉之策敵制勝
必武舉異等者舉之亦各於其黨也然敏辯言兵而望
風輒懼而舉之者又誰歟哉或曰相崇而䟽將重而遠

蓋親且近者咨乎嘻五樓之敗即中尉之門人潼關之
屢即軍容之上客旄節以賂得者有僨師之號招討以
貨取者亡封丘之師又何歟擇將之難也如此或謂君
王神武則駕馭必英雄然有君無臣古人歎之何也恭
惟主上聖武如堯勇知如湯競烈遵晦如武王然寤寐
方召旁招頗牧迺者發德音下明詔內而侍從外而計
臣令各舉偏裨以備采擢聖慮至深遠也伊欲謹差真
材允荅隆指據舊以鑒新舍短而集長策將安出願諸


君切磋究之將以聞焉

庚戌殿試武舉策御題

朕以寡昧獲承至尊壽皇之休德任大守重永惟保邦
安邊之要莫大乎二柄夙夜祇懼適求天保采薇之治
至親御鞍馬講武訓兵屢詔諸將一意拊摩選偏裨之
知勇而上樞庭戒將帥之掎克而察以御史朕於軍政
非不盡心焉今予大夫咸造在庭朕甚嘉之蓋聞古者
兵制夏商而上邈矣周家之制地方百里出土若徒者

三千馬此井牧之法也然乘馬之法一同百里出土若卒者七千有五百馬何其異也至於諸侯兵十大夫孟津之會侯國八百則兵之為千萬者六矣而天子之兵止七十有五萬馬財足以當十諸侯之兵而已矣豈強幹弱枝之制乎至於齊之內政晉之被廬秦之材官漢之南北軍七校樓船唐之府兵彊騎雖曰非古亦各有其制也其因革善否可得聞乎若夫厯代舟車步騎之異技奇異正偏之異法擇將者或以文或以武或以新

進或以老成何塗而得其人議兵者或仁義或詐力或
祖韜畧或祖孫吳何門而決其策予大夫講之熟矣恣
意以陳朕將親覽



誠齋集卷九十七